

D

VIII

18/1

na

D. XVIII k  
18



DISSERTATIO INAUGVRALIS MEDICA  
DE  
**IN- ET EGRESSV BILIS**  
**PER DVCTVM CYSTICVM E**  
**VESICVLA FELLEA.**

---

QVAM  
DIVINI NVMINIS AVSPICIIS  
ET  
GRATIOSI MEDICORVM ORDINIS  
CONSENSV,  
P R A E S I D E ,  
**IOH. MELCHIOR LVTHER,**  
PHILOSOPH. ET MEDIC. DOCT. ANAT. ET PHYSIC. PROF.  
PVBL. ORD. FAGVLT. MED. SENIORE ET p. t.  
DECANO  
PRO GRADV DOCTORIS  
SVMMISQVE IN MEDICINA HONORIBVS ET PRIVILEGIIS  
DOCTORALIBVS RITE CAPESSENDIS  
ERFORDIAE D. 12. MAY A. R. S. MDCCLXXII.  
PVBLICO ERVDITORVM EXAMINI SVBMITTIT  
A V T O R  
**WILHELMVS CHRISTOPHORVS ALBERTI**  
HANNOVERAN.

DEPARTMENT OF THE INTERIOR

NO.

IN RE: EGRESS & ENTRY  
OF ALIENS  
AND NATURALIZATION  
AND CITIZENSHIP



FOR THE UNITED STATES OF AMERICA

IN WITNESS WHEREOF, I have hereunto set my hand and the seal of the Department of the Interior at Washington, D.C., this 1st day of January, 1901.

WILLIAM H. HARRIS, Secretary of the Interior

BY SPECIAL AGENT IN CHARGE, U.S. DEPT. OF THE INTERIOR



VIRO  
REVERENDISSIMO AC ILLVSTRISSIMO  
DOMINO,  
D O M I N O  
**CAROLO THEODORO**  
**ANTONIO MARIA**  
**S. R. I. LIBERO BARONI**  
**DE DAHLBERG**

CAMERARIO WORMATIENSI, S. SED. MOGVNT. CAPITVL.  
ECCLES. CATHEDR. HERBIPOL. ET WORMATIENSIS  
DOMICELLAR. AC EMINENTISS. ELECT. MOGVNT.  
CONSIL. INTIM. RELIQUA

NEC NON  
VIRIS

ILLVSTRIBVS, MAGNIFICIS, EXCELLENTIS-  
SIMIS, CONSVLTISSIMIS, AMPLISSIMIS,  
**DN. ERNESTO GVILIELMO**  
**STRECKER, ICTO,**  
CIVITATIS PRAETORI, ELECTORAL. REGIM. CONSIL.  
PRAESVLI cet.

**DN. PETRO HENRICO**  
**HAILAND,**  
CONSIL. REGIM. ORDIN. SENATOR, CONSVLI SVPREMO



**DN. IO. CHRISTOPH. SPITZ,** ICTO,  
CONSIL. REGIM. FACULT. IVRID. ADSESS. ORD. SENAT.  
CONSVLI SVPREMO

**DN. BERNHARDO ALEXANDRO  
STRECKER,** ICTO,  
CONSIL. REGIM. ORDIN. SENAT. CONSVLI, PRIMARIO

**DN. IO. HENRICO GENAV,**  
ELECTOR. REGIM. CONSILIARIO.

**DOMINIS ATQVE PATRONIS**  
SVIS LONGE INDVLGENTISSIMIS  
HANC

DISSERTATIONEM INAVGVRALEM  
DEVOTISSIMO ANIMO OFFERT.

**TANTORVM NOMINVM**

CULTOR OBEDIENTISSIMVS

**WILHELMVS CHRISTOPHORVS ALBERTI.**





## PROOEMIUM.



Quot, quantasque dotes bilis in corpore nostro exerceat, neminem physiologorum latet. Per hujus enim secretionem decenter factam, sanguinis non solum crasis, seu perfecta sanguinem componentium proportio naturalis conservatur, sed & chylicatio maxime absolvitur. Salinis enim bilis particulis, chylus viscosus adhuc & crudus, magis dissolvitur & attenuatur; viscosi vero aqueas cum oleosis particulis unit, & in unum homogeneum magma solvit; nec non





acrioribus suis particulis intestina stimulat, ac horum motum peristalticum promovet, stimulando leniter tunicam intestinorum villosam, majoremque liquoris intestinalis secretionem promovendo: unde in hujus defectu, vel depravata secretionem, alvus aut pertinacissime obstructa, aut maxime pigra offenditur. Hoc evincunt calculi bilarii, hepar obstructum, aut scirrhum factum, vulnera ipsius vesiculae felleae, ubi nulla saepius clysterum vi alvus referari potest. Non parum etiam ad famem conferre, quorundam Autorum est opinio, hac inducti ratione, quod ictericis appetitus plerumque absit, & nausea nascatur, praeterea digestio debilis, & peculiaris languor adsit, & contra famelici, magna vesicula fellea, bile acri & amarissima donati sint, quidquod ab hepate majori solito, sano tamen, nullisque obstructionibus obnoxio, appetitus fortior, imo Bulimus ortum ducat. Quia vero dotes enumeratae, bili cysticae potius quam hepaticae adscribendae sunt, cum ob hujus fatuam dulcedinem alvus non satis liberetur, teste Fantoni, qui hujus causam, in ducto cystico clauso, hepatico licet adhuc aperto, invenit; hinc de ejus in- & egressu per ductum cysticum, pro viribus dissertationis loco quaedam dicere constitui. Quod leve meum conamen divinum Numen benedicere, æquus autem lector, æquibonique consulere velit, est quod expeto.

---





## §. I.

**A**nte omnia definitionis loco descriptionem quandam hepatis præmittere, ut ad propositum nostrum eo commodius venire liceat, necessitas exigit. Hepar igitur, bilis colatorium, est amplum, ac obscure rubicundum viscus, omnium maximum, aut certe ponderosissimum, totam occupans hypochondriacam regionem dextram, & ad epigastrium usque, sicut & ad lumborum partem supremam extensum, collocatur sub diaphragmate, ad illud concipiendum profundissime excavato; pars ejus inferior ventriculo, aliisque abdominis visceribus obvertitur; quadruplicem cum partibus contiguis connexionem habet: Superius scilicet cum diaphragmate, ope ligamenti suspensorii, in hepatis substantiam profunde penetrantis; inferius cum umbilico, per ligamentum rotundum, quod vena fuit umbilicalis in fætu; dextrorsum, per membranam propriam succingentem per plura, sed brevia stamina, cum variis peritonei areis: Sinistrorsum, cum cartilagine ensi formi; Peritonei productione involvitur; duos in lobos, scissuræ maximæ interven-  
tu distinctum, arteriam a cæliaca, pro sui nutrimento pene so-  
lam, quanquam ingens viscus sit, accipit; sunt tamen & aliæ, licet non perpetuæ, quæ a coronaria, mesenterica, nonnunquam a mammaria, ab epigastrica, phrenica, capsulari, & sper-  
matica viscus hocce adeunt; venas ad cavam omnes dimittit; Nervos ab intercostali, & extremo pari vago plexum efforman-  
tibus oriundos habet; est insuper insignis vena quædam, por-  
tarum nomine, quæ, ex adunatis, omnium fere abdominis vi-  
scerum venis exsurgens, obliquo tramite fertur ad hepar, mi-  
roque modo, penetralia istius ingressa distribuitur: hæc quam-  
vis





vis alias, omnis sanguis secretioni dicatus, fluat ad partes per arterias, vices gerens arteriæ, ac capsula Glissonii munita sanguinem venosum ad bilis secretionem devehit. Ex sanguine igitur isto venoso, plurimum licet a reliquo venarum sanguine diverso, utpote oleosis particulis, ac sub fœtido & vehementer denique alcalescente humore magis repleto, absque glandularum ope segregatur bilis, inque exilissimos ductus, pororum biliariorum, nomine insignitos intrat. Hi capsula venæ portarum tecti, ex intimis hepatis ubique nati, in trunculos sensim majores ad venarum modum confluunt, qui quidem rursus aliis ejusdem generis juncti plurimis, in unum abeunt majorem. Ille, instar arboris, ex innummeris simul unitis radicum capillis constans, egreditur ex hepate, tuncque ductus hepaticus appellatur; per portas egressus, tendit ad pancreas, eâ sede duodeno circumfusum, a vena portarum recedit, & porro dextrorsum, retrorsum descendens, aliqua parte pancreatis, per fescunciam tectus, ad posteriora duodeni, inter laminae mesocoli, cum ductu pancreatico coit, & eodem sinu in ejus intestini aliqua eminente ruga aperitur. Dum autem ad duodenum sic pergit ductus hepaticus, advenit in ipsis portis, dexterior inter vasa ejus partis, canalis alius, hepatico plerumque multo minor, quandoque autem æqualis, aut major, & longe ei adglutinator, multa cellulosa tela ad eum revinctus & parallelus, ita ut bioculare ductum efficere videatur, qui mox oblique tunicas istius perforat, & postquam inter has aliquantulum sese insinuat, ejusdem in cavo versus tertiam longitudinis partem rotunda hiat apertura, quæ a Laurentio, Laemburgo & Winslow, valvula muniri dicitur, quæ vero nulla est, nisi eminens non maxi-





maximum calcar, quale etiam in venarum concursu observari solet. vid. ill. Haller. Physiol. Lib. XXIII. Bilem igitur quam continet ductus hepaticus, hac apertura eructat in novum illum canalem, qui cysticus ideo denominatur, quod, dum ex una parte sub majore hepatis lobo transit, ampliorem sensim, ut habet Celeb. Bianchius in Hist. hepat. part. I. Cap. XVIII. §. II. adquirat cavitatem usque quo in expansionem quandam ampullosam, subrotundam & vesicularem desinat, quæ a figura, humoreque recepto dicitur cystis fellea, folliculus biliaris. At ductus ille cysticus vinculis cellulosis ita incurvatur, ut ad inferiora non parum descendat; hinc fundus cystidis illo inferior est multo; præterea vinculis istis cellulosis extus in sulcos colligitur, ita ut intus rugæ, tunicæ villosæ & nerveæ, emineant, quæ a multis pro valvulis putantur, quarum maximam posuerunt ea in parte, ubi ampliari incipit, sic ut fere totum ostium vesiculæ claudat; ea in parte autem, qua ampullæ instar intumescit, ac cystidem constituit, in sinu quodam faciei infernæ hepatis insculpto tenetur, eique maxime adhæret. Nunc vero portio cystici canalis altera, quæ ductus choledochus & communis quoque vocatur, ex eo, quod videatur exsurgere ex unitis duobus mox memoratis ductibus (quanquam Vater cat. mus. propr. pag. 93. ductum cysticum in homine ab hepatico adusque duodenum divisum viderit) terminatur ad finem duodeni, & in illius partem posticam primo inseritur, indeque inter tunicas ejus oblique deorsum fertur; postquam enim exteriorem tunicam penetravit, inter eam & secundam tunicam, ad duodecimam circiter unciaë partem, deorsum progreditur, ibique hanc etiam perforat, interque illam, & tunicam interiorem semi-unci-





ali fere longitudine prorepat, tandemque hiatu rotundo in intestinum aperitur.

## §. II.

Cystis fellea turget ferme semper bile amariori, majoris & vis, & acrimoniæ, minusque diluta, quam ea, quæ per hepaticum ductum jugiter fluit, excepto fætu, in quo constanter dulcis est, mucosa, rubra, insipida, vid. Swammerdam resp. pag. 113. Has autem dotes bilem contrahere morando, uno conclamant ore Medici omnes, & procul dubio calculi isti, qui sæpe gignuntur in cystide, humorem in hac aliquamdiu morari comprobant, sicut & ductus cystici directio ad eam confirmandam opinionem non parum conducit. Num vero bilis ista, qua repletur cystis fellea, vel in ipsiusmet cavo generetur, id est a massa sanguinea separetur, vel ab hepate per canales huic operi peculiariter dicatos vehatur ad vesiculam felleam? quæstionibus hisce lubens supersederem, nisi materiæ pertractandæ ratio id exigeret, utpote ab Autoribus jam satis ventilatis, refutatis, atque rejectis. Nam quod glandulas attinet, quas quidam melioris etiam notæ Anatomici in interiori cystidis membrana somniarunt, nil sunt præter lacunas quasdam, quæ humorem fundunt mucosum, ad obliniendos cystidis parietis internos, ne scilicet acrimonia bilis lædantur; quales & in urethra, vagina muliebri, aliisque locis conspiciamus; ita ut Bianchius in historia sua hepatica cap. XVII. §. IV. jam dixerit; bilem per hæc glandulas fecerni, ridicula est aliquorum confabulatio. Majoris ponderis prima fronte videri posset altera quæstio, num per.





perductus speciales bilis cystidi fellea adveniat? Cum iterum iterumque ductus hosce invenisse, Autores plurimi extent, eosque hinc ductus hepatico-cysticos nominaverint; verum ductus hosce in homine opinatos, vasa fuisse rubra, jam dudum monuit Ruyfchius Epist. V. pag. 19. Quidquod ill. Hallerus sollicite vesiculam felleam ab hepate solvit, ut singula numeraret vascula, quæ refecaret; vidit ramos arteriosos plurimos ex hepatico vesiculæ alveo, in ejus membranas tendentes, qui flavo etiam ob vicinam cystidem, tincti erant colore, eo modo, quo tingitur pars coli vesiculæ felleæ adjacens: vidit venulas, cellulosa fila eodem colore imbuta, ut facile pro biliariis canalibus habuisset, nisi sibi imponi voluisset, sollicite autem originem naturamque veram rimatus, nunquam biliarios esse meatus, aut in cavum cystidis patere, invenit: & si unquam vere adfuerint, pro varietate potius, quales a communi modolo recedentes vasorum distributiones non rarissime etiam in aliis & maximis vasis reperimus, habendos esse statuit. Ex quibus itaque rationem perspicimus, cur aer per hepar insufflatus ad vesicam felleam usque perveniat, per vasa enim sanguifera, quibus commercium hepar inter & cystidem instituitur, pervenit.

### §. III.

Restat igitur ductus cysticus, tanquam unica via, qua bilis ad vesiculam pervenire queat. Posset equidem via hæc valde improbabilis, ac legibus hydraulicæ repugnans videri, dum ductus cysticus cum hepatico fere parallelus §. I. & ad angulum valde acutum cum eo coeat, ita ut nullam adesse vim vi-





deatur, quæ bilem in ductum cysticum retropellat; hepate tamen presso bilis facillime vesiculam subit; aer etiam in ductum hepaticum immissus, hanc viam facillime sequitur. Vinculum ductui cystico injectum, hunc, collecta vinculum inter & intestinum bile, tumidum reddit; quidquod dilacerata vesicula, bilis ab extremo ductu cystico in animantibus manare versus dilaceratum vesicæ fundum testes sunt Autores. vid. Bohn. pag. 134. Ruysch. Veritatem hujus magis adhuc confirmat vir & eruditione & industria commendatissimus Morganius, duabus suis observationibus in Epist. Anatom. no. 43. quæ sic se habent: in quarum altera cystidem tam brevem, tamque angustam inveni, ut imo fundo ab jecoris limbo satis distaret; majorem autem oleam tota continere vix posset. Bilis inerat per pauca, ex viridi pallida. Hepaticus ductus duplo erat amplior, quam par fuisset, rugosæque intus superficie; sed non in retis formam disposita. Nimirum credo, quæ bilis in cystim divertere debuisset, eam magna ex parte in eo trunco subsistere coactam, hunc olim dilataffe. Demum celeb. Lieutaud. in act. Reg. scient. Acad. ann. 1735. & in opere suo, quod galliæ inscribitur, *Essais Anatom.* pag. 305. refert, se in cadavere quodam cystidem ita constictam reperiisse, ut eam desiderari primo crediderit intuitu; nil bilis in ea continebatur, & partes vicinæ, sicut vesica ipsamet, quæ flavo colore tingi solent, ne levem quidem coloris istius præseferiebant impressionem. In cervicis autem cavo nigricans delitescibat calculus, qui ita hac in parte membrana, melius dicam, sacculo, retinebatur, ut ad vesiculam pelli nequaquam posset. Ductus hepaticus communis & cysticus capaces erant admodum. Calculis in vesica fellea existentibus, dilata-





latatum ductum hepaticum adnotavit celeb. Ludwig. Ductu cystico coalitu, hepaticum latiore, & recta via cum choledochum continuum fuisse Autor est Ortesch. diar. venet. p. 102.

§. IV.

Modum jam, quo bilis per ductum cysticum ad vesiculam perveniat, ut rite intelligamus, ductus hujus, nec non vicinarum situm, fabricam, diversamque, pro diversis temporibus actionem, sedulo perpendere, necesse erit. Quodsi igitur post peractam alimentorum in ventriculo digestionem, chylo excrementis commixto repletur intestinum duodenum; tunc illius paululum extendantur tunicæ, necesse est; verum eæ nequeunt extendi, quin occludatur ductus choledochi ostium, membranis, inter quas oblique transit, sibi mutuo per compressionem intus factam applicitis. Interea jugiter ab hepate stillat biliosus humor, dum ejus continua fit secretio; ille solito cursu ad ostium intestini fertur; ista autem clauso, intestini cavitatem subire nequit, unde etiam duodeno inflato neque aer in ductum choledochum venit, vid. Hamberg. Physiolog. Sic & in Memoir. de l'Acad. 1749. casus, ubi a fungis comestis, duodenum mire distentum esset, ductum choledochum ligamento quasi strangulatum fuisse legitur. Colligitur itaque bilis in ductu choledochum, & illius intra breve spatium temporis totam occupat cavitatem. At dum res ita peraguntur, contenta in ductu choledochum bilis, non tantum contractis abdominis musculis premitur, & ad effluxum concitatur, sed & affluente semper bile urgetur; inde viam, qua prementium vires effugere possit, quærere cogitur,





& sic retrogrado in ductum cysticum resilit pede, dum ad vesiculam facillime aditus pateat, faveantque humori retrogrado, & de clivis semita, & rugæ tunicæ villosæ in ductu cystico contentæ §. I. quæ descensum molliorem reddunt, atque refluxum præpediunt. At dicet aliquis, bilem pressam æque facile in ductum hepaticum resilire posse! verum hic obstat bilis advenientis de hepate per viam rectam flumen, a quo versus duodenum continuo pellitur; quanquam minime negari possit, ductu choledochi a calculo aliave causâ pertinaciter obstructo, & bilis iter præpediente, eam in ductus hepaticos demum revolvi, perque eos in venam cavam, & in universum corpus sese diffundere; unde icterus nuper natorum pertinet, qui ut rectissime putat Monro & Bagliv a ductu choledochi per caseosa concrementa obstructo dependet: quis ideo partem aliquam bilis in homine sano per hepar in sanguinem venosum refluere recipiet.

#### §. V.

Bilis itaque rebus sic stantibus facile hoc sequetur iter, & quasi sponte veniet in vesiculam felleam, donec illa semel repleta, plus humoris admittere impar erit. Ibi morando, eas, quas in medium protulimus, dotes bilis adipiscitur, & postea per eandem viam, per quam venerat, ad intestinum fluet.

#### §. VI.

Definito nunc atque perspecto bilis ingressu per ductum cysticum in vesiculam felleam, ejus egressum paulo curatius indagare





gare superest. Quoniam autem bilis tanquam fluidum viscidum & maxime ponderosum contra gravitatem propriam ob ductum cysticum ascendentem §. I. sursum propelli debeat, hoc autem vim atque potentiam præsupponat, hujus disquisitio jam nostra erit occupatio.

§. VII.

Multi vim seu potentiam hanc in ipsomet membranaceo & tunicato hoc receptaculo posuerunt, seu quod idem est, in ipsam & tunicarum contractione, fibras musculares inter ejus involucra assumti; sed fibras non rubras, sed splendentes potius, vario ductu, tamen ut pene longitudinem vesiculæ sequerentur, & ad valde inæquales angulos se secarent, vidit Heverman Tom.III. pag.760. duverney p.234. Est ubi nullæ adparuerunt, nullæque a nuperis, sed neque a vetustioribus, harum rerum gnaris admittuntur. vid. Haller. physiol. Lib. XXIII. Licet etiam darentur, fibræ non eæ sunt, quæ tantis pollent viribus, nec ratio assignari potest, cur per vires sese contrahant, dum bilis egressum e vesicula fellea chylicationis opus tantum exoptulet, & hujus evacuatio non successive ac pedetentim, sed subito & uno quasi impetu fiat; irritabile ergo ejus involucrum dicas; verum ea est ejusmodi, ut a venenis quidam sese contrahat, non autem ab aliis verioris notæ irritationibus. vid. Haller. physiol. l. c. Veritatem igitur assecutus is erit, qui potius ventriculum alimentis turgidum, cystidem premere & bilem ad exitum provocare sentit. Assertionis nostra veritas magis confirmatur per id, quod in animalibus post longam inediam evisceratis, ob flaccidum minusque extensum ventriculum, exsuperanti





ranti semper bilis copia turgens & plena cystis offendatur; in aliis autem post largam & lautam ciborum ingestionem apertis, cum extenso & prominente stomacho semiplena observetur bilis vesicula; manifesto documento, bilem solum quiete degere & congeri in conceptaculo suo, cum tensio incumbentis stomachi eam non urgeat ad exitum; ex quibus etiam intelligitur, cur in fœtu humano ob parvam inanis pene ventriculi ad eandem vesicam compressionem, fellea vesicula semper plena observetur; quibus impono

**FINEM.**









